

# OMUKWE TU



40c

No. 22

ISBN 0-620-06828-0

## OMAGONGALO OMAPE NATANGO 12 NOMPUMBWE YAASITA MU ELCIN

Ompumbwe yaasita mOngeleki Onkwaevaangeli paLuther muNamibia (ELCIN), otayi thelekenya eyakulo nonando ope na natango omahala omape 12 taga dhiladhililwa eyakulo lyopausita omumvo 1988.

Etegameno lyOngeleki okuyapulila aalongwasita 12 moshilonga shuusita omumvo tagu ya, ngele inapu holoka omaimbo, itali kandula po Ongeleki yi iyage momutse, aayakulwa koombinga noombinga sho taa pula eyakulo lyopausita.

Pamahala ogendji omagongalo pethimbo ndika, otaga lelwa kaasita mboka ye li popepi nokuya moshipundi shevululuko,

nayamwe otaa tameke nokuli omumvo tagu ya. Aasita Jason Amakutuwa, Juuso Shikongo naKristian Shipunda, Elelongeleki oye ya zimine ya ka lye oshikwiila shevululuko omumvo tagu ya sho ya tsakanitha omimvo dhawo 70, dhuukuluntu.

Omahala taga landula, ombelewa yomukwathi gwomumbisofi, oye shi koleke, kutya otaga longekidhilwa okudhikwa pamuthika gwegongalo, 1988. Okambebe, ondjakulwambinga yaNgenga; Eenghango, tali zi mOhalushu; Onangolo, ondjakulwambinga yEenhana; Ruacana; Eengoma, tali zi moNakayale; Etambo tali zi moTshandi; Okalale tali zi mOkahao; Onkumbula muuzilo wOndonga nUukwanyama; Onyuulaye tali zi mOkankolo; Esheshete tali zi mOntananga nOpuwo, mOkaoko.

Omahala ngaashi Okambebe nOnangolo, ogi itungile oongeleki dhago dha yapulilwa iilonga nomakwawo otaga kondjo natango ga ninge shoka. Ompumbwe onene otayi adhika wo mUushimba moka iilyo oyindji yOngeleki ndjika ya halakanena mo, sho ya fadhuka po omaudhigu giita nekongo lyiilonga.


Sebulon Ekandjo

### Etseyitho

*Okrimesa oya thikana ila ko HEKA MARKET, wi ilandele ohema yomoode yoshinanena lela, omagwe gomothingo, uutenda womomakutsi, uulinga niinima iikwawo.*

*Ayihe otayi monika mo HEKA MARKET.*

*Ila oto yakulwa nombili.*



## YATATU YA SILE METOPO LYOBOMA



— Ombinzi yawo oyatika omolwombili yoshilongo shika

— Mbaka oyo ya yi momusholondondo gwaahokololambinzi yoshilongo shika

Ehokololo alihe tala kep. 6 na 7



**OmuKriste gwashili nando na kale e li muudhigu uunene, oku na etegameno, kutya uudhigu otawo hulupo molwoonkondo dhaJesus Kristus omumangululi nohupithi. Oshi shi okukonekwa kutya omahepeko gAanamibia otaga koko esiku nesiku nogi indjipala nokuli ngashingeyi noonkondo.**

Aanamibia kaye na we esiku lyenyanyu, lyevululuko netalaleko. Esiku kehe aantu otaga kundana oonkundana dhomaso, dhomadhengo nodhomakwatopo notaa lili. "Kalunga ketu omolwashike? Omuwa gwetu oshike tatu mono iihuna? Omolwashike?"

Aanamibia otawo kondjo esiku kehe opo ya ze momathiminiko ngaka omatilithi. Ihe nando ongawo omakwatopo, omapatelwo moondjedhililo, omafiko gomalusheno nomambandapaleko otaga ningilwa mboka taa pula eyalulo lyuthe-mba womuntu kehe moshilongo.

Uuwehame wAanamibia owu li ishewe mpoka sho kaye na emanguluko lyokuholola omadhiladhilo gawo, nosho wo kaye na emanguluko lyokweenda shaa mpoka ya hala moshilongo shawo yene, nenge ethimbo kehe omolwokangendjo kuusiku.

Pethimbo lyongashingeyi opo na Aanamibia aakeenandjo ye li moondholongo notaa mono omahepeko gomadhengo nomafiko gomalusheno. Oyendji oya kwatwa po nokweedhililwa naakwanezimo yawo kaye shi mpoka ye li.

Namibia lya ningi evi lyoluhodhi moka aakuluntu ya nika uuthigwa molwoyana ya dhipagwa. Inashi puka ngele otatu ti omahepeko oge li momulandupangelo gwaSouth Africa. Iilonga yopambili yopapolotika epangelo oye yi ekelahi nando tali ti, olya hala okukuthapo omukundu pambili.

Molwaashoka epangelo olya ekelahi ehala lyoshigwana, ota shi ulike nokuli, kutya okatokolitho 435 kiigwana yahangana kake na mo ehala momalongekidho ga SA gemanguluko lyaNamibia. Onkalo yopapolotika otayi holola, kutya kape na endhindhiliko tali holola nkene epangelo lya SA tali ka lunduluka momadhiladhilo galyo.

Pethimbo lyongashingeyi aakiintu otawo kwatwa koonkondo komakakunya, aantu ota yugwa eliko lyawo notaa li dhipagelwa. Omalongelokalunga otaga halakanithwa kaakwiita yaSA.

Omahepeko ga tya ngeyi nuuwehame wa fa mbuka hawo wotango muuyuni mbuka. Aakriste yotango oya li wo ya kala monkalo ndjoka tatu vulu oku yi yekekanitha nonkalo yetu yonena. Oya li ya hepekwa ya tidhaganwa ya tulwa moondholongo kepangelo lyaRoma, ihe Kalunga okwe ya kuthamo momatidhaganano ngaka. Otatu lesa wo mOmbimbili kutya uuyamba waKalunga owo uuyamba waakriste. Kalunga iha sindika kusha, naakriste okwe ya pa wo oonkondo ndhoka opo yaa sindike.

Nonando Aanamibia taa mono omahepeko, oye na etegameno neinekelo, kutya omaupyakadhi nomahepeko otaga hulupo, nemanguluko lyashili ota li ya. Naashika oshe ya kwatha ya kale ya na einekelo, nomukumo gwetegameno lyopakriste.

Aakalimo yoshilongo oyendji oyo aakriste noye shi shi, kutya oya kuthwa momilema nokweetwa puuyeleele waKristus. Oya tseya ondjila

## UUWEHAME WAANAMIBIA NETEGAMENO LYOPAKRISTE

yemanguluko noyehupitho. oshigwana osha mangululwa mo nale momilema dhasatana, onkee satana te shi tondo molwokukondjela emanguluko, uuyuki, ombili nehanganitho.


Ihe monkalo yomukriste shika itashi kutha po einekelo lyawo, oshoka oye shi shi kutya otawo kondjo pamwe na Kristus omumangululi, anoakriste oye na etegameno ndyoka li na sha neitaalo lyawo, kokutya nando taa hepa, Kristus okwa sinda eso nuuwinayi kehe. Kalunga okwa kutha omuntu meso nomoshiponga, nokwe mu fala komwenyo gwaaluhe nosho ta mangulula wo Aanamibia muupika nomilonga yinyanyalitha yaSA.

MuPetrus lyotango 1:7; 4:2 otatu ndhindhilike nkene omahepeko otaga koleke eitaalo lyomukriste, onkee eitaalo lya kola otali kalapo wo komahepeko, ngaashi oshingoli tashi holoka po sho tashi hemunwa momulilo gwa hanya.

Shika osha faathana nomahepeko gAanamibia. Mpoka pe thike Aanamibia taa hepekwa, opo pe thike taa pula nokulwila emanguluko lyoshilongo shawo. Omadhipago, omadhengo, omakwatopo, omafiko gomalusheno nomatilitho omakwawo taga mweneke Aanamibia okupula nenge okulwila emanguluko lyashili moshilongo shawo. Omahepeko otaga indjipalitha ehala lyemanguluko.

Otu shi shi kutya Aanamibia otawo pangelwa pwaawo uuyuki nombili. Shika osho naanaa sha ningilwe Jesus pethimbo ndiyaka. Aanamibia aaluudhe naa tseye kutya Kristus okwa hepekwa molwayo wo, okwe ya thigila oshiholelwa. Ngoka ta hepekwa moluyyuki, molwombili, molwemanguluko nosho wo molwehangani-tho, oye omunelago.

Ngele omuntu ota hepekwa molwedhina lya-Kristus, kokutya moluuyyuki, moluuthikepa-



**Omusita David Iileka**

mwe nomolwombili, nena oye omuyambekwa, oshoka ota ningi shoka Kalunga a pumbwa. Ihe natu dhimbulukwe wo kutya Kristus okwa hepa nopehala lyetu. Omahepeko ge ogo ga ninga omahepeko getu. Onkee ota na ashike ondjila yimwe oyo ihe okwekelahi nokutinda uukwaty kehe waa na uuyyuki. Omukriste kehe okwa pewa oonkondo nuuthe-mba okukondjele emanguluko lye nolyoshilongo she. Shika osha yela kutya Kalunga kehupitho nokemanguluko ota mangulula mo oshigwana shaNamibia

**David Iileka  
Onakaheke**

### Kehe ngoka na kale peha lye megongalo

OmuKriste kehe ota tegelelwa peha lye mongeleki nomegongalo. 1Kor. 12:27. Ngele olutu olwoopalekwa kiilyo, osho wo otatu yono nenge twa kanitha oshilyo shimwe megongalo. Omuntu gumwe ngele i iteka po uukwashilyo, ota mono Ongeleki negongalo, nehala lye otali ningi omwaka. 1Kor. 12:28.

Ongeleki negongalo oyi na oompumbwe odhindjidhindji, omuntu ta vulu oku dhi yakula nomaganano ngoka e ga pewa kuKalunga ngoka e li mwene gwegongalo. Okwe ge ku pa opo u yakule nago Ongeleki negongalo. Omaganano gopambepo ga longitha moongundu ngaashi:

- dhaalumentu
- dhaagundjuka
- miikunino
- moomeme
- dhaa...bi
- Osikola yOsoondaha
- Ekoleko neshasho
- epukululo (ekuthilo)

Ngoka ta yakula ngeyi, oye ombasikena tayi tungu metungo nota longitha omaganano ge pamuthika gwago Rom. 12:3-8.

Inatu hepitheni ethimbo.

*Lisias Samuel  
Osikola yOmbimbili  
Ongwediva*

### Taambathaneni ngaashi Kristus e mu taamba

*Koshigwana oshiholike, omumvo nguka 1987 mu ELCIN alihe ogwa pewa oshipalanyolo shika: Taambathaneni ngaashi Kristus e mu taamba okusimaneka Kalunga, ngaashi sha nyolwa mu Rom. 15:7. Onkee ano aakwashigwana atuheni tu taambathaneni opo tzeni tu kaleni nombili yomonkalamwenyo yetweni aakwashigwana. Esilohenda lyOmukulili nombili yaKalunga nayi kale pamwe natse nonuumvo 1987.*

Eino Josef Natangwe  
Etalaleko Sec. School

## Tu tuleni uukuni kumwe — Aanangeshefa shefa taa indile

Ehanganotumo lyAanangeshefa Aakriste muNamibia (ETAAN) olya li lya ningi oshigongi shalyo shaayehe shotangotango moka ya indile oshigwana ashihe shaNamibia shi tule uukuni kumwe naanangeshefa mboka opo ku pendulwe po omahupilo goshilongo. Oshigongi shika osha li mOngwediva mongulu yiigongi yOngeleki ya ELCIN eti 21.10.1987.

Ehanganotumo ndika olya thikama maanangeshefa yOongeleki unene ngaashi yaKatoolika, yaAngilikana noya ELCIN (ELOK). Oongeleki dhilwe wo ndhoka dhi itaala muJesus Kristus, pafatululo lyomunashipundi gwopevi, omunangeshefa Silvanus Vatuva, nadho otadhi vulu okuninga iilyo yEhanganotumo ndika.

Eindilo lya tumbulwa, okwa li lya pulakenwa kookuume oyendji yehanganotumo ETAAN yomomaithano gi ili nogi ili mboka ya li ya hiywa owina okukala moshigongi shiyaka nokupulakena omathaneko omape ga zi kEwilikongundu lya ETAAN nokukutha wo oshitolwa moonkundathana.

Omutonatelishitayingeleki shUuningininomOngeleki ya ELCIN, omusita Josaphat Shanhala, moshigongi shiyaka okwa dhimbulutha aanangeshefa kutya oye na oshinakugwanithwa oshinene shokumangulula Aanamibia muupika womaluhepo gokolutu.

Okwe ya dhimbulutha wo ya taandelithe ohole yaKalunga neyakulathano maantu yoshigwana shika, unene tuu pethimbo ndika li na uutondwe noli na omaluhepo gomaludhi oge-ndji.

“Ngaashi Moses a li i ithanwa kuKalunga, osho nane aanangeshefa omwi ithanwa okulonga iilonga yaKalunga manga omutenya. Omwa ithanwa okumangulula aantu yomevi lyetu muupika womaluhepo gokolutu.

Oshoka uupika mbuka ohashi vulika u ka yakithe omuntu, ohashi vulika u ka dhipagithe omuntu, nohashi vulika wo u fale omuntu

kokule naKalunga,” omusamane Shanhala okwa li ta popi ngeyi pethimbo a li ta tamekitha oshigongi shiyaka nokulesha ohapu yaKalunga.

Mokufatulula omalalakano ga ETAAN niinakugwanithwa yehangano ndika, omusamane S.Vatuva okwa lombwele aapulakeni ye kutya omukwambepo ngoka ta ka yakula mu ETAAN, oshinakugwanithwa she shotango okukwatha aanangeshefa pambepo koo-gumwe noogumwe nenge te shi ningi paku ya gongela. Pakulongela kumwe noongeleki dha tumbulwa metetekelo, ETAAN ota ka kwathela wo Oongeleki ndhika mokulonga oshilongatumo mpoka ta vulu.

“ETAAN ota ka sa oshimpwiyu mpoka ta vulu, okumonena Aanamibia iilonga noowino dhokutseya iilonga twa dhini okutumbula iilonga yuunamapya nuuniimuna. ETAAN ota ka sa wo oshimpwiyu, opo iilikolomwa yaantu ngaashi omahangu nomatanga ga monenwe oompito dhokulandithwa po, peha lyokutukilwa miigandhi.”

Pafatululo lyomusamane Vatuva, iinakugwanithwa yilwe ya ETAAN oyo ngaashi okumonena aanasikola oompito dhokwiilonga nokutota po ombaanga yaNamibia, oshoka oombaanga adhihe tu na muka odhaakwiilongo.

Pahapu dhomunashipundi omukuluntu gwehangano ETAAN, omusamane Frans Aupa Indongo, ETAAN oyo emwayinathana nEhanganotumo lyaanangeshefa aakriste muSoomi (Finland).

Okwa tsikile ta ti kutya ETAAN ehanganano epeepeka inaali gwanitha noomwedhi hamano, oshoka olya totelwe eti 18.7.1987 konima sho aanangeshefa aakriste muNamibia ya li ya talele po Finland omumvo gwa zi ko.

Ndokotola guanamiti ta longo moshipangelo shaShakati, omusamane Salomo Amadhila pompito ye okwa li wo a popitha aanangeshefa moshigongi shiyaka ta ti:

“Aanangeshefa yomuNamibia ondi shi shi oshiwana noshoopala mu kale mu na omakwatathano nomahangano galwe koombinga noombinga dhuuyuni.”

“The dhimbulukweni aamwameme kutya aanangeshefa Aasoomi hoka mwa li, yakwetu oya mona emanguluko noye li memanguluko. Tse natango emanguluko inatu li mona; onkene shaashoka tamu kundathana nayo, ya dhimbulukitheni aluhe mu shaashoka tamu ningi mu longele kumwe, opo oshilongo shetu shi manguluke.”

Ndokotola Amadhila okwa dhimbulutha wo aanangeshefa mboka ye hole ondjokonona ya tsikile okulesha omambo, ano mboka taa vulu, opo ya tale nkene oshilongo shetu sha tameke kombinga yomahupilo okuza pethimbo Aandowishi ye ya moshilongo shika sigo opethimbo ndika tu li ngashingeyi. “Opu na oshindji sho mu na oku shi tseya, opo mu vule okungeshefa nawa,” osho a tumbula nomuthindo.

Kakele kaanangeshefa yomOwambo, oshigongi shiyaka osha li wo sha hiya aanangeshefa yomUushimba noyokOkavango. Osha li sha hulithwa negalikano komusita gwaAngilikana, Filippus Shilongo.

(Omayelithilo)



## Aakiintu muArandis ya dhenga yakwawo niimaliwa


**Ontanda yaakiintu ndjoka ya dhanene petameko lyaKotoba nuumvo, naandjoka omuwiliki gwayo meme Aino Kapewangolo a ti, kutya oyo yotango koludhi lwayo, oya li nelalakano okutota ashike oshiketha shoshilonga mokati kawo, mUushimba. Ongundu kehe yaakiintu mpoka hayi gongalele, oya li ya pewa oshinakugwanithwa shokugongela R100,00, ngoka inee shi ninga, ota yalulwa e na ongunga.**

Pehulilo lyoshigongi, opwa yalulwa R4658,68, ya zi moongalo, momandhindhiliko, moshinakugwanithwa shongundu kehe nomekondjelo lyepandela. Ongundu dhaakiintu, konyala 10, odha li dha itula methigathano lyepandela. Ongundu yomuArandis oyo yotango ya anduka mo momwaalu R1055,63. Ontiyali Omba-ye R360,77.

“Eyooloko enene unene nolyo lya nkundipaleke egongelo alihe,” osho efolo Kapewangolo a yemata nokwa sikumudha ontanda oshinima shoka shaa endululwe we omimvo tadhi landula.

Ekondjelo lyepandela alihe olya eta ashike omwaalu R3042,65 moshigongi shoka. Ontanda ndjoka momumvo tagu ya, aakiintu oya tokola yi ka dhanenwe kOmaruru

Sebulon Ekandjo



Oshigongi shaakiintu yomUushimba mongeleki yomina muArandis.

**Elongo ohali endeke pamwe neputuko okuhanga oshiwana shonhumba. Loo nee eputuko nge tali uya, ihali etelele ashike ouwa, ndelene nowii yoo. Apa onda diladila kutya, oilonga keshe eshi ya yuka moule, yo otai pumbwa omunhu ou e i shii yo moule. Ou e he i shii, ta yapuka nokukanifa ngaha oilonga, ngeenge ina kala ta kendabala nokuliwedela ko.**

Ame ondi udite nee kutya, eputuko eshi le tu hanga, ola fa la etwa la pilamena ko. Eshi oilonga yeembelewa, youlongi noyouhakuli ya patulukila moshiwana shetu, oya fikila oshita neudaneke eli kutya, omunhu wa putuka, ou na okulonga wa fewa. Hano okudja opo osha kala oiyolifa okuhanga omunhu ta longo a djala ekalanyana, ota talika e li mongudu yaavo inava putuka.

Eshi ne omhumbwe yomatungo eefikola, oupangelo osho yo eengeshefa dinene ya tokolwa okukandulwa po, okwa kala nee haku pulwa omahangano ovatungi avá ve na owino mokutungo, opo a kandule po omumbwe ei.

Alushe nge wa dingonoka nee petungo la tya ngaha, ovayandji vomunhoko, eedopi novau-nduli voutololi, ovo ngaho ovakwashiwana shetu. Hamomatungo amuke, ndele keshe ngaho nee apa pwa ka twa oilonga yokomake, meengalasho, meefabulika doipilangi nosho tuu, oshiwana shetu osho ngaho oshi ingidwa: Eta shonhumba ile shongadi.

Petameko lomilongo heyali (1970), omo ofikola youngoba ya shiivifwa noya tameka koshitukulwa eshi shetu. Ngeenge ohatu dimbulukwa nawa, efimbo eli ola li omokati kelongo lopauBantu. Hano kapa li pe na elongo lopahokololo la kwata moiti pefimbo linya.

Nomolwaasho osha li sha lukwa kutya ava hava i kougoba, ovo ava ve he shi wete nawa momaumbo. Osho sha kala sha udika ko ngaha fiyo sha mena yo momitwe daavo hava kofikola ei (kougoba).

Elao linene omwa ka dja ngaho ava ve na elalakano nohokwe yoilonga ve i lilongela, nova ka kongwa oilonga yoludi olo tuu olo, nove li tave i longo fiyo onena.

Mo 1979, konima eshi ehanganomina la CDM la tunga ofikola oyo yelifikameno, omo ovalongwa votete va nyola ekonakono lopashiwana (National Examination) ongudu oyo yotete (NTC 1), okudja nee opo, osha kala nee tashi ende xwepo. Ovo nee va kala have uya nelalakano kutya: "Shaashi oko ku he na oilongwa yomomambo," ova kala nee have litu modjuu ou wedopo.

Otu shi shii okupandula ouwa, nande oo omunini natango, wa longwa fiyo opapa kofikola youngoba yokoshitukulwa shokoumbangalanhu. Oiiimati ya kunwa kofikola ei, ohatu i li paife notai ende tai hapupala kanini nakanini.

Eshi ngaho ombinga imwe tai xwepopala, yoo ikwao nani oi li moudjuu. Oonakukonga oungoba otava ende tava hapupala, ndele yo omhumbwe yoonakulonga, otai ende tai longo.

Okudja tuu petameko fiyo ofikola ei, otai wanifa konyala eedula omulongo, ovapukululi aveshe va kala tava yakula mo, ova kala ashike ovadjaadjai, hano inapu kala pwa monika nande oumwe wovakwashiwana a pyokoka nokwe

## Oungoba noshiwana shokoumbangalanhu

lilongekida okuninga omulongi mofikola ei.

Paife ope na sha ngaho tashi ulike, kutya elitulemo otali ende ngaho tali hapupala kanini nakanini. Paife etata loonakulonga mofikola ei, ovadalelwamo.

Onda hala okutwa omukumo ovadali va kwafe ounona mokuholola omaifano. Keshe tuu nee eifano okanona take li hoolola, ngeno ka kale ke shii omolwashike ke li pumbwa, oke na tuu shili ohokwe mulo; oke lilongekidila tuu shili omawua, omawii nomaudjuu eifano olo.

Eifano nee keshe la hoololwa kokanona, inashi pumbiwa ashike omudali u konge oitwa yokufifa ounye okanona mokulandula eifano olo, ndele kongwa yo oitwa tai kumike. Oshihapu nee moshiwana shetu, kutya omudali ile tuu omulongi shimha a lombwelwa kokanona, kutya oka hala, shaa ka piti ongudu yonhumba, ka landule eifano longadi, ndele oli na sha nougoba, oshiponokela shomapulo haka mono aa oludi eli ngaashi:

Owa hala nee okulonga nekalanyana? Owa hala nee moilonga oyo ya kaka, nosho tuu?

Ope na oshinima shimwe nda hala keshe umwe e na oshisho shonakwiiwa yedu letweni, e shi konakone moule pauye mwene. Omhumbwe yoilonga otai hapupala moshilongo eshi shetu efiku nefiku. Omaifano amwe oku na ovanhu vahapu nande otu shi shii inaa wanifa natango, ndele amwe kae na sha nande.

Oitukulwa; shehongo noshouhaku, oyo oitukulwa hai mono keshe omudo ovanhu va putudwa mokulonga oilonga oyo. Oshitukulwa ndi shi okudiinina she he uditike ko ile pamwe shi he holike, osho oshitukulwa shoilonga. Ondi wete kutya apa omutengi owa pupala xwepo keembinga dimwe, ndele kuikwao, onghee ngaho tau djuupala natango.

Elalakano lange moshinyolwa, omu haku kwafa ashike okuninipika ovayandji veedopi novau-nduli voutololi, ndele okushivifa yo kutya konima youngoba oku na yo omaifano amwe a ya moule, e dule oungoba woovene. Amwe ohae lilongelwa komungoba ye mwene, te liwedele ko, omangha makwao hae lilongelwa meeuni-versity nomeetechnica.

Hano onda hala tu konakoneni fye tu moneni kutya ope na omaifano mahapu a pumbiwa moshiwana shetu, fye tu shiive yo kutya nge omaifano mahapu a pumbiwa moshiwana shetu, fye tu shiive yo kutya nge omaifano aeshe otae litukulilwa nawa, nomhumbwe yoilonga otashi dulika i ka tye po yo xwepo.

Ehelo lange koshiwana olo eli: Keshe ou u na ouyelele tau wapaleke ile tau weda po, u manguluke oku shi ninga. Natu dimbulukwe yo kutya ashishe hatu shi ningi onelalakano lokutunga nokukwafa mokuputuda oshiwana.

**Fredrick Nghiuuelekua**



# YATATU YA SILE MOSHIPONGA




Jesaja Ananias

**Omwedhi Kotoba gwa zi ko, ogwa li omwiinayi kuunona womoshitopolwa shiita, moka mwa sile utatu ombadhilila moshiponga shoboma yopeke nuukwawo utatu we ehamekwa mii-ningwanima ya yooloka. Oomwahe otadhi pangwa natango moshipangelo shOngeleki yaELCIN mOnandjokwe.**

Uunona oonakusa owo; Angelipine ya-David (6); Kerdula yaDavid (3) uumwayinathana naHortesia yaImmanuel Shiyoka (7). Auhe aakuluntu oye li mOluno mOndangwa, noya pambathana.

Oshiningwanima osha li sheti 23.10.1987 komatango pomazimbukilo giilonga,



Lineekela Hafeni

pookamba dhaKakwiyu, popepi nOluno, mpoka pwa uvika etopo ewinayi, manga uunona mboka une wa li tau dhana pokati kookamba nondjila onene yoteya ya ya mOndangwa.

Oonakusa yaali, oya hulithile mpoka, Hortesia okwa ka hulitha konima yethimbo efupi sho a thiki kOnandjokwe nomutine gwawo Ndalelwa yaPetrus (7) ngoka awike a hupu ko, nota pangwa natango mOnandjokwe.

Omukulukadhi Saara Kakunya, yina yanakusa Hortesia, esiku ndyoka sho a tsakanene nOmukwetu moshipangelo, manga a tegelela ekwatho ndyoka okamwana take li pewa, okwa li ethimbo ndyoka e li mehaluko enene. Omusamane gwe Immanuel Shiyoka, pegumbo ina

adhika po, okwa li natango kiilonga kOshomeya (Tsumeb.)

“Kape na ngoka e shi shi shono sha ningwa po, tse atuhe aakuluntu otwa adhika owala tatu landitha mondunda yetu, notwa lombwele uunona u ka dhane pondje. Omupelo ashike gwe tu papudhula notwa adha uunona wetu auhe wa lala koho yolwithi,” osho meme Saara a yamukula epulo lyOmukwetu.

Omukadhona Gertrud Stefanus (24), ngoka mboka ye mu shi ye mu hokolola kutya oye a kala omuleli gwuunona auhe mboka, naye Omukwetu okwa adhele e li monkalo ombwinayi yehaluko. Okwa li ta hekumuna pethimbo ndyoka, ye ta kakama. Naye wo ina tsey a shono sha ningwa po.

“Iiponga yooboma oku yi shi, okwa hupile



musho,” gumwe goonakweeta uunona koshipangelo osho a nongonene Omukwetu pevi, ye te mu ulike nomulungu.

Eti 21.10.1987 moshipangelo tuu shono shaNandjokwe, omwa adhikile opo mwa taambelwa okamati Lineekela yaHafeni (12), hoka nako ka hokolola, kutya oka topelwa koboma manga ka li taka dhana noshitenda shoshihauto momudhingoloko gwOkakwiyu.

Oya adhikile ye li yatatu, ashike oye awike a mono oshiponga. Lineekela ina tsey a oboma moshitenda shono haye shi kokolola shito noku shi longitha oshidhanitho shawo shoshihauto, ngele opo ya tulwa mo esiku ndyoka, nenge oya kala mo noshito. Nguka okwa mono etando moshiponga shoka.

Natango moshiningwanima oshikwawo, okamati koomvula 12, Jesaja Ananias oka ningi omasiku taka pangwa mOnandjokwe iilalo yoboma yopeke, moka pahokololo

**Tala kepanja tali landula**

# SHOBOMA NAYATATU YE EHAMEKWA

lyoshipangelo, oonyala mbali dhokoshikaha shokolumoho, dha teka.

Okamati Jesaja okomomukunda Onailonga, megongalo Ohaukelo. Oshiponga she Jesaja okwe shi tula kombanda yaakwiita ya SA, mboka a ti, kutya oyo ayeke a mono ya pitile pomagumbo gawo omasiku gamwe etopo li ningwe.

Manga taa dhana nuunona uukwawo momuti popepi negumbo lyawo 20.10.1987, okamwayina okashona oke ya mo wo ka humbata peke oboma, aniwa oshidhanitho shako. Oke yi toola meni lyenkolo lyawo. Jesaja okwa dhimbulula, kutya oshinima oshiponga nokwe endebele oku ke yi kutha.

“Manga inaandi yi ekelahi, yo oya topa nale peke,” osho a hokololele Omukwetu manga ta tanauka pokambete ke kuuwehame wiilalo mbyoka ya li tayi monika olutu aluhe. Okamentu haka Jesaja pOmukwetu kaka li taka dhimbulukwa we kutya oya li yangapi momuti moka, shoka ashike taka dhimbulukwa, oya li oyendji, noko ka li okakuluntu kuukwawo auhe. Oye awike a zile po e ehamekwa.

*Sebulon Ekandjo*



Meme Albertina Jason ta hungu okamwana Ndalelwa (5) pombete mOnandjokwe.


## YA SILE EMANGULUKO NANDO OYA LI IIKAHA YOWALA

**Omusita Matti Amadhila, omukwathi gwomumbisofi, manga a li ta popitha oohe nooyina yoonakusa yuunona utatu mboka wa sile moshiponga shoboma, okwa pangula noonkondo omikalo dhaakwiita mevi ndika okutula nowino nenge okuthiga nuuhethi shaampoka iitopitha mbyoka tayi kanitha oomwenyo dhaanona oyendji moshitopolwa shika.**

Amadhila epopitho lye okwe li ningi 23.10.1987 pegumbo lyomusamane Shiyo-

ka, mpoka oosa dhuunona auhe utatu dha lililwa. Okwa tsu aavali yoonakusa omukumo, osho wo aapulakeni ayehe yi ile kehupulutho, kutya mondjokonona yekondjelomanguluko lyevi ndika, otamu ka adhika aahokololambinzi oyendji, mboka ya gandja oomwenyo dhawo mokusa, omolwombili yeve, nonande yamwe kaye na oondjembo pomake, ngaashi aanona mboka ya sile metopo lyoboma.

Okwa ti, yo kaye na siku naa dhimbwe aanona mboka mekwatathano nekondjelo lyemanguluko lyeve ndika. “Mbaka oya sile ombili nemanguluko ndyoka tse tatu li ko-




Omuleli gwuunona Gertrud Stefans monkalo yehaluko

ndjele notatu li lalakanene,” osho Amadhila a ti.

Omukwathi gwomumbisofi okwa koleke wo eitaalo lyaalilasa mokutumbula, kutya omaso goludhi nduka, otaga etwa kuutondwe wokutondathana, nokuulunde, ihe kooitaali, Kalunga okwe tu galikanene nale twaa kanithe nando eitaalo lyetu lyomuye, nonando tu tsakanekwe kushika.

“Aatondi yetu oye na ashike ompito yokuyona po omalutu getu, ihe kaye na oonkondo nuuthemba wokukeelela oomwenyo dhetu dhi ye mehupitho,” osho Amadhila a hekeleke oonakuthigwa po.

*Sebulon Ekandjo*



Omidthimba dhilwe omandjandja oga li ge li kombanda, nadhimwe iipala kayi shi okutalwa. Okandjugo moka dha lala, oka li ku udha ezimba ewinayi, nomalaakana moka omidthimba dha siikilwa odha hipakana ombinzi.

# Ondjalulahokololo yolugodhi pokati kepangelo lyaAngola na SA nuumvo

Nonuumvo epangelo lyoshigwana sha manguluka shaAngola olya ninga onkambadhala yokuhulitha po ongundu yaa-namapowe, ndjoka epangelo lyaAngola tali ti otayi yambidhidhwa ku SA nokepangelo lyaReagan gwaAmerika.

Ondjalulahokololo yolugodhi lwonuumvo, tayi landula mpaka, oya kuthwa moshifonkundana The Namibian. Oshipupudha shongundu yaUnita momithitu dhaAngola pahokololo ndika, osha tamekele muAguste e tashi hulu muKotoba.

Ekanitho lyaashihe sha ningilwa epangelo lyaAngola olya tengenekwa poobilyona oodola 12, (konyala R24 billion). Iimaliwa mbyoka epangelo lyaAngola lya li li na ompito okupendula po nayo evi, oya kanene owala miita inaayi shainwa yaAngola na SA pamwe naAmerika.

Aguste 26, 1987: Etanga lya SA, lyedhina Frogmen, olya teya po ontopa kombanda yomulonga gwaKuito. Aakwiita yamwe yaMPLA nayo oya sile mo.

Septemba 6, 1987: Omatanga ga SA gomokamba yaBuffalo, oya tsakanena nomatanga gaali gaAngola. Aakwiita ya SA 11 ya sila mo, ihauto, itatu nondjembo 14.5 ya thigala molugodhi.

Septemba 13: Natango etanga lyokamba yaBuffalo olya ponokele aakwiita yo Fapla nomakanona AML-60 naAML-90. Aakwiita 21 ya SA omo ya thigala. Omugoyi yomuyo aatiligane. Omakanona gane AML -90; omakasi-peli 3, oondjembo mbali dhomashina M-79's, ooefena mbali, iikuti nooboma nayo omo ya thigala.

Septemba 20: Oondhila dha SA dhuuhwa-

lala (Impala) hamano odha tengela moshitopolwa sha FAPLA, odha gwa mo mombanda.

Septemba 22: Natango uuhwalala (Mirrages)owa tengela moshitopolwa sholugodhi sha FAPLA, kamwe oka gwila pevi.

Septemba 23: Shidhagadhaga gwa SA, manga a li ta tuka kuuzilo waGuito Cuanavale, okwa gwithilwa pevi naakalimo ye ayehe, inaa tumwa we.

Septemba 26: Natango oondhila ndatu dha SA, odha gwithilwa pevi, manga dha li tadhiti tuka moshitopolwa sha Fapla.

Kotoba 3: Omadhagadhaga giita gatatu ga SA oga li taga tuka pokati kaLomba naCujamba, oga gwithilwa pevi. Otaku ti siku ndyoka olugodhi olwa li olupyu pokati ketanga lya FAPLA nomatanga gane ga SA taga yambidhidhwa koondhila dholugodhi ngiika 10 lwaampoka nokomakanona G5 na G6 Valkyrie ngoka ga gandja uushadha kaakwiita ya FAPLA.

Kotoba 6: Oondhila dhiita dha SA, odha tuka kombanda yodoolopa yaMongwa, moshitopolwa shaCunene.

Kotoba 9: Okadhila kokupekapeka ka SA manga ka li miilonga, oka gwithwa mo, kuuzilombugantu waCuito Cuanavale. Esiku ndyoka oondhila dha SA odha tuka kuuzilo nokuuzilombugantu waCuito Cuanavale, moshitopolwa shaTombwa, moNamibe. Manga omahauto giita ga kala tagi inyenge pOndjiva naKuanhama moCunene.

Kotoba 11: Etanga lyaFapla olya yaha mo oondhila ya SA muuzilo waCuito Cuanavale. Esiku ndyoka oondhila dha SA inaadhi konekwa omwaalu, odha ponokela okamba yaakwiita yaFapla.

Kotoba 12: Etanga lyaAngola olya umpila oondhila mbali dha SA. Inaku tseyika shono sha ningwa kudho. Esiku tuu ndyoka, Onamakunde oya ponokelwa koondhila dha SA 16, dhimwe odha tuka kombanda yOkahama nokombanda yaMulondo moshitopolwa shaHuila.

Ehokololo ndyoka kwa tiwa olya gandjwa koministeli yaAngola yomakwatathano niilongo yopondje, olya patana thiluthilu epopyo lya SA, kutya Angola momalugodhi ngoka ota yambidhidhwa kAarusia nokAacuba.

## Emanguluko noimaliwa

Omolwashike Mandume ohamba yaUkwanyama kakwa li ya mona ofikola, elongo, ndee okwa li inai hala oupika? Omolwashike ovanhu vopefimo lopaipe ova hongwa nawa, ndee ovo tava kelele emanguluko moshipala? Osheshi nee mwa ti hamu kwata oimaliwa ihapu? Omwa uda kwa tiwa ovanhu ava va hongwa, ngeenge otwa manguluka, itamu ka mona vali oimaliwa ihapu?

Hano efeni Namibia li manguluke, shaashi nge otwa manguluka, otamu ka mona ngoo oimaliwa i dule opo nokuli. Oimaliwa i he fi yohonde.

Fye otwa loloka koita. Vakwetu osheshi mu li mOvenduka.

H. Hilayi  
Okalongo

## OMUKWETU

No 1 Registered at the GPO as a Newspaper 101

### Ehulithopo lyiita olyo eyamukulo, hamalondondho

Aakalimo yomoshitopolwa shOwambo, oomwenyo dhawo odha vulithwa komaso, unene komaso guunona wawo, mboka omuntu waa shi kutya otatu sile shike, tashi ningwa ashike pamukalo gwokuthigathiga iitopitha shaampoka, mokati kaantu. Etanga lyegameno miiningwanima oyindji nopoompito odhindji, ohali kumagidha oshigwana shaa gume nando uunima mboka tuu hili omeho noinaau igililwa momoho, nekumagidho ndyoka ewanawalela.

Etanga lyegameno ohali pukulula wo oshigwana, kutya mpoka oshigwana tashi itsu iinima ya tya ngaaka, onawa shi endelele okutseyithila kookamba dhalyo, naashoka omadhiladhilo omawanawalela, oshoka Etanga lyegameno olyo alike tali vulu okuguma iinima mbyoka.

Ihe oku na iinima mbyoka ya nkundipaleka eyambidhidho lyoshigwana moshinima shoka. Otashi vulika Etanga lyegameno li shi shi, nenge kali shi shi, ashike Etanga lyegameno olyo lyene lya pendutha naanaa omalimbililo miinima tayi landula:

Etanga lyegameno poompito dhimwe olya dhaadhiga ooboma dholwithi manga tali piti pomangundumaneno goshigwana mokuhalitha iinima yasho nenge shaampoka shi li po, pwaa na efatululo, kutya omolwashike noshigwana oshi na eitaalo lya kola, kutya molwithi moka omu na uuzigo mboka monakuyiwa tau ka eta oshilanduli shawo.

Omasiku hamale omusamane gumwe sho a li a yemata pOmulukwetu, omeya ge ngoka a adhika opo a yuula nuudhigu momuthima, aakwiita yetanga lyegameno ye ya po, e taa umbile mo omboma yolwithi noga yonuka. Aantu oyendji momukunda ohaa nu momuthima ngoka, ihe inaa pewa efatululo, kutya omolwashike mu na okuumbilwa iitopitha po pwaa li uuwinayi washa?

Natango aakwashigwana oya hokolola pOmulukwetu nkene taa limbililwa omaihumbato gaakwiita. Aakwiita ngele oya thigi oshitopitha mpoka ya li po, e taye shi ulukilwa mbalambala, ohaa ti oye shi dhimbwa po nenge osha kana. Ngele osha topa, manga inaaye shi kutha po, ohaa ti kashi shi shawo, osha SWAPO.

Ishewe poompito odhindji ekumagidho lyaakwiita koshigwana shi tseyithe omathigathigo giitopitha mbyoka, ohali ningwa omuntu eendjidha omwaalu omunene gwiimaliwa mbyoka yi na okufutwa omutseyithi. Ngele oshi na sha nehupitho lyoomwenyo dhoshigwana, omolwashike ano tashi kwatakanithwa niimaliwa, olyo epulo lyoshigwana.

Omaihumbato goludhi nduka mokati kaakwiita yetanga lyegameno, ngo ga kanithitha einekelo moshigwana shaa taleko nesimaneke omalondodho haga ningwa ketanga lyegameno, kutya oge li tuu mombepo yegameno lyoomwenyo dhaantu, nenge okukwata ashike oshigwana komeho. Onkene shono sha yuulukiwa unene komeho gaayihe moshigwana, nOngeleki wo osho tayi popile, okuhulitha po iita mbyoka oshigwana shaa lwete ompumbwe yoku yi kaleka po, peha lyomalondodho geigameno lyiita.

**Eyamukulo kuTitus Gerson moshifo sheti  
15 Septemba 1987, epanджа 11**

*Kaume, Titus! Opolotika oto i shiva ngeenge to udu noto mono oshiwana shaNamibia tashi hepekwa, ove to udu nai pamwe nasho. Kaume Titus, ove hano owa hala u tekulwe nawa kulye, nge nani hakunyoko eshi to mu denge to ti ine ku tekula nawa? Outeku uwa owe wu pumbwa ngaa nani? Tu kwafa nee tu tekuleni Namibia mokukondjela eliko loshilongo shetweni.*

Amadhila N. Angula

**Komakakunya neepapeta**

*Omwe shi holola kutya nye kamu nakonasha noshiwana shaKalunga, omu na sha nomauwani vene, tamu li nawa, tamu nangala nawa, tamu djala tamu shendje. Ondjala punye kaipo, oimaliwa omu na, nge ino dipaifa omunhu, ove ino lopota ku na apa to hange omboloto.*

*Paije otamu popi ngaashi mwa hala, molwashi omwa kuta oimaliwa oyo ya futwa omwenyo womumwanyoko winya wa lopota, wa dipaifa. Kunye epangelo eli li li koshipundi paije otali ende nawa, kakele ketu ava twa kanifa shihapu ngaashi vamwe katu na vali eenhele dokukala, katu na oomeme, katu na ootate, ovamwameme eendenge detu omolweni.*

*Fiyo onaini to kala neliko we li kufa momwenyo wamukweni? Kaleni mu shi kutya otamu ka pulwa ovamwanyoko ngaashi Kaeni.*

Johanna J. Derrie  
Windhoek

**Ou na edhina ewanawa shili,  
nande ngoye mwene omwiinayi!**

*Nalimanguluke, otashi ti ngiini ano?  
Eshike li manguluke?  
Li mangulukile shike?  
Li manguluke ngiini?*

*Noolye taye li gandja, koolye?  
Otali manguluka ngiini ngele owe li kwata mwene?  
Mumwameme, kondjitha epangelo lyokatongotongo, opo u manguluke ngaashi wa hala.*

Aina Hanganeni Angula  
Sweden

**Eyamukulo kuGerson Titus  
Ekakunya**

*MoNamibia kamu na elongo lopapolitika, omolwokatongotongo. Ndele omahepeko otaa monika naanaa noupu taa ningilwa ovakwashiwana. Naau nee u shi wete ndee owa ya moukakunya oto landifa po oshiwana shoonyoko.*

*Oukriste mehanganano la SWAPO omo u li, ndee oo oilonga yomunhu mwene a tokola, kutya ota kala omukriste ile ahowe. Vali ehangano kali lilepo oukriste, ndele okukondjela emanguluko loshilongo shavo.*

*Noilyo yavo otai pulwa i kale i hole oukumwe, ombili nokulilongekidila okufila edu lavo shi he na kutya omukriste, omupaani, omukomonisi, oshilumbu ile omulaule. Dr. Sam Nuuyoma okwe shi popya luhapu nosha holokele mOmwakwetu neudo.*

**“OVA SHANGELA NGE TA VA TI.....”**

*Ousosiale kau shi okutonda Kalunga, woo oukomonisi itau dengele, shoo osho nee to mono kutya nomoilonga yousosiale eengeleki tadi longo neefelo lepangelo omo eengudu doukomonisi di li koipundi. Aabisofi ngaashi nakusa Dr. Kaldy Zoltan moRepabulika yopashiwana yaHungary, osho yo Johannes Hanselman moRepabulika youdemokoli yaNdowishiland va kala ovaleli vehanganano lOvakwaluther mounyuni (LWF).*

*Meeprograma dopolotika nomomaimbilo opakondjelomanguluko ihamu tumbulwa shili eendjovo daKalunga, shaashi opolotika ihai dongwa mumwe noukriste. Ohamu tangwa nee ovanani vongudu ava ve litokolela okuhepa, omanga ovanhu vamwe va ya moukakunya omolwoku-hola oimaliwa.*

*Omaimbilo opakriste ohaa imbwa mongeleka nomoilongeleka nope na alushe eefelo oku shi ninga, naluhapu ohamu kala oilyo yelolongudu yehanganano ile nookuli Nuujoma ye mwene.*

*Okudja 1884 eshi Ovandowishi ve ya okukolonyeka ootatekulu ngaashi Witbooi wOvanama, Maharero wOvaherero ove va lwifa. Mandume yoo okwa lwifa Ovaputu lwopo 1917. Hano Ovanamibia ova lwifa naanaa ovatondi okudja lela petameko.*

*Oukakunya hamidjalo ndele oilonga yavo youkolokoshi.  
Mbululungama  
Swapo Member*

**Omapulo kuTitus Gerson**

*Olyelye a imba eefikola dopapolotika moshilongo, opo ovanhu va udifweko opolotika?*

*Titus Gerson, owa hala kutya she ku twala moukakunya omolwashi ovanhu vaNamibia inawe ku tekula nawa, nonghee owa tokola oku va denge nondjeho yovahona voye ovo ve ku tekula nawa, ile owa hala okutya ngeheli?*

*Titus, otashi ulike kutya ove mwene eshi u li moukakunya ou shi eshi to ningi. Owa shiva ngahelipi eyooloko pokati koukapitali noukomoni ngeenge ku na eudeko lopapolotika?*

*Ou e ku lombwela, kutya SWAPO oya nyama koukomoni olyelye? SWAPO oyovanhu vaNamibia, ndele kai fi yovaRussia ngashi wa udifwako kovahona voye veembulu. SWAPO ohai tambula ekwafo tali di keshe ombinga, kutya nee okoukomoni ile koukapitali.*

*Kombinga oukriste, ino dimbwa kutya SWAPO oi na eengeleka, keshe apa pe na Ovanamibia mounyuni. Eshi to longifa Ombibeli apa, kutya hola mukweni ngaashi u lihole, ndelenee ohole voye oyoimaliwa ei we liyandja kuyo?*

Kambulu Lyakwata  
Harare Zimbabwe

**Otali manguluka ngiini ngele oto li landitha po?**

*Mpaka onda ulika oshipopiwa shaNalimanguluke Titus Gerson (ekakunya) lyokOndangwa. Ne mwa hala okuuva omambo pamwe naantu ayehe mongeleka, omwa hala okutya aantu mboka oya yooloka kumwe naamboka hamu*

*hepeke? Nenge aasita mboka haa uvitha, nayo inamu ya kwatapo mu ya hepeke?*

*Owa hala okwiulika ongekakunya ekriste. Ano uukriste woye openi ngoye to gwaaleke oshigwana shoye wa fa Judas? Oukriste ongele nee to zi momambo to ka yotha aamwanyoko komulilo?*

*Ethimbo opo li li mu itedhulule ne mu ethepo iilonga yomahepeko koshigwana. Emanguluko lyoshili otali ke ya, naahona yeni otaye ke mu ekelahi.*

Tuli-Mekondjo Ndamono R.K.  
Sweden

**Omakakunya mokati kaantu nonkalo yago kewatelo lyongeleki**

*Otandi popi shika ongotandi dhana, pakonakono ngele tatu taleni oshinima shika shomakakunya okuyakulwa unene tuu mongeleka. Omolwashike omakakunya haga yakulilwa moongeleka go oge li ashike omadhhipagi nomahepeki goshigwana? Oongeleki otadhi ti aniwa oga futa iigandjwa noga kolekwa, onkene taga yi kUulalelo, taga fumvikwa momawendo gomagongalo nosho tuu.*

*Kwathii ndje mu konakone iinima ngaashi tayi landula:*

1. Iimaliwa yomakakunya mbyoka haga gandja iigandjwa, naambyoka haga umbu moongalo oyoombinzi dhaantu aakaanandjo yaNamibia noyaAngola, omolwashike oongeleki hadhi taambeke iimaliwa mbino yo oyoomwenyo, dhaantu tayi tulwa moshiketha shaKalunga? Nenge pamwe iimaliwa ihayi gandjelwa Kalunga?

2. Omakakunya ohaga zi owala mokuti, ihaga kuthilwa, go ogu uka kUulalelo, go hwiya ga zi oga thigi ga dhipaga noga dhenga aantu.

3. Tse omakakunya inatu ga yalula aakwashigwana shaNamibia, oshoka andola oga li omakwashigwana, andola ihaga dhenge nokudhipaga aakwashigwana.

4. Oongeleki kombinga yoondjindikila okuningila SA, odha tala ko tuu nawa? Ngele odha tala ko nawa omolwashike inadhi ningila omakakunya oondjindikila, go ogo naanaa SA omunene? Oshoka onkee tuu ga tamekele ogo owala taga

5. Natu kambadheleni twaa helele omakakunya, oshoka ngele osho tashi kala ngeyi, nani Oongeleki itadhi longo pauyelele, oshoka ngaashingeyi odha landula owala mboka ye na iimaliwa.

*Aambisofi yetu otaa kondjo lela nomukumo okukuga onkugo yoshigwana shawo, otandi ya pandula, ihe oshili kombinga yomakakunya aaye, taliipo nawa mpo.*

6. Omakakunya ogo ga pa SA oonkondo okatokolitho 435 kaa ye miilonga, oshoka otaga dhipaga po aantu yetu mboka taa kondjele emanguluko lyashili.

7. Omakakunya inaga fumvikwa we momawendo gomagongalo, oshoka katu wete uukriste, nuuyuuki wago, tse inatu ga yalula omamwameme, shila omamwayina ga SA. Ando oga li omamwameme, ando otaga lili pamwe noshigwana shetu. Eloc Anglikana naKatolika, akwetu konakoneni nawa oshinima shoka.

N. N. Toivo  
Oshakati

**Tala kepanджа tali landula**

# MITENGE YE DHI TULA PO. YA THIKI- THWA. OONGODHI YE DHI THIGI KO, NODHO DHA MWENEKWA

Aakuluntu yetu ayehe yaali osho ye tu tetekele muukwaaluhe. Oyo tate Leonard Mulenga nameme Anna Titus, mboka ya li momukunda Onamulunga megongalo Oniipa. Oya pewa omagano gaanona yahamano. Muyo, gumwe naye wo a tetekela, nopu na yatano natango.



Tate Leonard okwa mana oondjenda nalenale, Etitatu koshiwike, eti 5 Juni 1946. Okwa thigilile ihe omuselekadhi gwe ta lele iimputu yawo. Kalunga okwa kala shili Kalunga kekwa tho lyomuselekadhi ngu. Okwe mu pe ohenda okulela oomvula 41, konima yeso lyatate. Omuselekadhi ngu mokudhimbulula kutya esilohenda lyaKalunga enene kuye, okwa vulu okutumbula aluhe kutya "Kehe ngula ohenda ompe."

Ina zimina iimpwiyu osho wo ina ambidhidha oshimpwiyu shaangoka ta hala okupondwa kuyo. Peha lyasho okwa tsu kehe gumwe omukumo, i inekele Kalunga, ngo ihaa nyengwa kusha. Peha lyokuyemata, okwa nyanyukwa. Peha lyokutsa omazima, okwa imbi. Olwindji okwa hambelele peha lyokugalikana.

Omasiku 24 Juni 1987, Etitatu koshiwike Tate Kalunga okwa zimbula wo omuselekadhi ngu miilonga ye muuyuni muka, muuwehame wethimbo ele. Okwa adhika a gwanitha oomvula 88 nomasiku 12.

Tse oonakuthigwapo otatu hambelele Kalunga sho e tu kwathitha kaantu ye oyendjiyendji. Pethimbo lyuuwehame, one ookuume amuhe, oshili omwe tu kwatha unene. Ongele poshipangelo, omwa endebele one aapangi oku tu kwatha nokwaambidhidha nokupopitha nombili. Oondohotola aasimanekwa, ashihe shoka mwa ningilile omuvu gwetu, osha kala ekwatho ewanawa kuye manga ethimbo inaali thikana. Tate Kalunga ne mu yambeke.

Ookuume amuhe, ongele megongalo lyetu nenge palwe, otwe mu pandulile ohenda yeni. Oyendji omwe tu galikane megumbo lyetu sho mwe tu talelepo. Osho sha kwatha omuvu gwetu opo a imbe omahambelelo, nando okwa lala ethimbo ele. Tangi unene.

Amuhe twa kaleni moshituthi shoosa, naapenduli amuhe, ongele mwa holoka nomalutu nenge noontumwafo, kune otwa nyengwa shili okutumbula niitya.

Omuwa ne mu kwathe wo one amuhe, kehe gumwe pampumbwe dhe. Oye ne mu yambeke ilonga yeni iwanawa mwe yi tu ningile.

Tu kaleni melalakano, opo tu ka thike wo menyanyu lyaaluhe moka aakuluntu naanona oyendjiyendji ye tu tetekela mo.

Frieda Elago

## Oukulunhufikola muNamibia

Onda lulilwa kovahongi veefikola tava kondjele oukulunhufikola. Oshinima eshi moshilongo shetu osha ninga mo eedula dihapu. Onale ngoo nee twe shi tala, ndee paife efimbo ola fika nee, opo oinima youkwamunghoko i kale ya tekapo mo-Namibia nenge fye otu li oshiwana shimwe muNamibia.

Ame mwene onde shi talako, kutya eshi osha etwa omolwoimaliwa ihapu oyo hai kwatwa. Ndelenee eshi osho naanaa oukapitali sho osho nee inatu hala omu moNamibia. Vo nee ovakulunhu ava hava yandje eenghatu edi, onda tala ko kutya ova fa hava futwa kuvakwao. Ndele ngeenge osho shi li ngaho, eshi osho naanaa oulunde.

Nye nee ava hamu di koilongo yokokule notamu fiye po omikunda deni di li komakule, shiveni kutya oimaliwa oyo ye ku eta kokule ngaha, oto li oimaliwa yohonde yovakweni.

Hano onawa pomanangeko ovakulunhu veefikola pu talike nawa, poo pu lundululwe, opo omanangeko a kale haa nangekwa nomukalo umwe u lili.

Fyee inatu hala vali omaudifo ovakulunhu veefikola ava va fiya po eefikola davo. Osheshi otava kondjele omaliko taa xulupo.

Kaleni mu shi shii, kutya otamu ka pulwa oshilongafano sheni nge otamu shi longo nomapuko.

Hano oshilongafano sheni kashi fi okukondjela omaukulunhu eefikola, ndee okuxumifa oshiwana sheni komesho, nande oho kwata oumalilwa vanini.

Tangi eshi tamu ka lundulula po.

Hilayi  
Engela

## Aalongi ando okwa li haa futwa kaakuluntusikola ando ongiini?

Aantu nee yaKalunga, otamu lalakene tuu ombili nenge ondumbo? Omuntu sho wu wete omulongi ta langekwa posikola, ndele oku ku vule palongo, ino tya okwa tya ngiini, to mu lundile. Tya owala inandi hala ngono, onda hala omukulukadhi gwandje, tse kale naye posikola yimwe, oshoka oye e na onzapo ya huma. "Ngame, oshilenganyama", to ningile komongula.

Oshikondo shelongo oshi ipyakidhila okulangeka aalongi, pomahala ga shewa. E tashi si oshimpwiyu okufuta omulongi kehe pamuthika gwe. Oshike inamu hala kamukweni taka li omagadhi? Sitheni ondumbo, okahalu, efupa nomalundilo momitima dheni.

Nambahu Johannes  
Okahama

## Emono loixuna moNamibia

Onda hala okupopya kombinga yetanga olo tali liifana Etanga leameno. Ope na ngaho shili ava tava amenwa, ndele vamwe hatu hepekwa shoshili, nde fye itatu tila oku shi popya, kutya ohatu monop oixuna, nedina limwe ohatu ti ashike Etanga ledipao, omolwoilonga yavo tai shi holola.

Keshe etanga oli na ovakulunhu ovawiliki, valo nde ihava tale nande oilonga oyo tai longwa kutya oyoupika. Shaashi kave nakonasha, ovo ove ya okukolonyeka oshiwana shovalaula. Kuwo oinima oyo tai ningilwa oshiwana shilaula oiyolifa ashike.

Ihatu mono nande ovatilyane tava hepekwa ngaho ngaashi ovalaula nande. Otave shi ningi omolwoukoloni ou ndishi? Omutilyane manga ashike e na okakopi kotee, ke na vali ediladilo, kutya ovalaula otava mono oixuna. Ngeenge ta diladila, shapu omutilyane a dipawa komulaule ta i a ka tolake, kutya naye na dipawe ile a kale modolongo oule weedula omulongo.

## Oshili tuu paMibeli?

Ngeenge oto ilikanene mukweni opo a kwatafane naKalunga kaye, ove eilikano to li tula momhepo paRadio, osha yela tuu? Otashi tu kumwe neendjovo odo di li mu Mateus 6: Ovelishe 5-6. Eilikano tali ilikanewa momhepo ola twa tuu kumwe neendjovo odo?

W. B. Kantalelo  
Oranjemund

**DIDILIKA:** Epulo eli ola holoka nale kOmu-kwetu muJuli 87, fimbo oshipopiwa shovafita moshifo No. 21/87 inashi holoka.

Johanna Joram  
Windhoek

## Ovakulunhu vokomongula

Ovakulunhu vonena ove li pokuxulapo, otaku teelelwa ku tulwe moilonga ovakulunhu vokomongula. Novakulunhu va tya ngaha ove na okulongekidwa nawa. Atusheni otu shi shi nawa nokutya u he na omutanda ku na ngobe, u he na omhaona ku na oilya.

Osheshi omumati nokakadona ka nyika omalodu itaka dulu okuteleka onghuta yomukongo, ta i kookongo. Osho yo omumati a nyika omalodu ita dulu okwaamena oshilongo nge sha ponokelwa kushikwao. Vamati noukadona, onye ovakulunhu vokomongula, onghee ohai ti djaleni ouladi manga mu li mefimbo omhito oyeni, i longifeni ngaashi tai monika.

Mnr. Eneas V. Haifidi

## Etanga lyegameno oli li peni?

Oshitya etanga lyegameno otashi ti ngiini ano? Lyo etanga lyegameno ohali monika peni? Onda hala okumona etanga lyegameno, oshoka kandi li shi, ondi lyuuvite ashike tali popiwa.

Tse ohatu uhala tatu mono iihuna moNamibia, nenge Etanga lyegameno oyo ndi hali tu monitha iihuna? Ngele oyo ndyoka, inaku tiwa we Etanga lyegameno, naku tiwe ashike Etanga ekolonyeki (edhipagi).

Aanamibia oya kutha ko oongaku ya vulwa

Tala kep. 11

okutselwa ngaashi omuntu a kwatwa komukaga ta tsele po oongombe dhe.

N. Shetwaadha  
Keetmanshoop

## Tu yambidhidhathaneni

Onda hala okuholola omadhiladhilo gandje kaanasi-kola ayehe muNamibia, ongele omooprime nenge omooseko. Ondi shi shi, kutya osha yelega omulongwa kehe osho wo omugundjuka kehe kutya, otse oshigwana shangula naaleli wo yoshilongo shika.

Paushili ngele omuniilongo e ya megumbo lyaandjeni, ta kongo omulalo, ndele e ta tameke ta ningi oompango dhe noku mu pangela ngaashi a hala, peha lya-mwene gwegumbo, ondi shi shi kapu na nando olye te shi pitika. Shika otashi gandja uyeyelele kutya kapu na nando ogumwe ta tsu kumwe nekalomo lyaakwiita ya SA nepangelo lyaivo lyokatongo.

Etumwalaka lyandje kune aagundjuka naanasikola amuhe, onda hala oku li tumbula nomukumo niitsa tayi landula:

— Ngele otu hole iimaliwa, otatu ka landitha po oshilongo shetu ngaashi mboka ye li mepangelo lyopakathimbo taa kambadhala.

— Kapu na shoka tashi ningwa po, ngele otwa mwena.

— Otu na okwiigandjela tse yene mekondjelomanguluko, moka Kalunga mwene te tu wilike, nesindano olyetu.

Oku na oyendji mboka yu uwako ekondjelomanguluko epuko. Onda hala oku shi yelitha mpaka, kutya ekondjelomanguluko itashi ti kutya atuhe tu homate, ihe ngele otwi imanga kumwe e ta tu kwathelathana, ongele opaukwiita, paupolotika nenge pankalathano, osha yela kutya otatu ka mona emanguluko nziya.

Ithindi Andreas

## Ino dengifa eehombo omitwe kumwe

Onda hala okunyamukula ile okupopya sha kombinga yoshipopiwa sha popiwa komushangi umwe moshifo shonomola 12 epandja 10, omo a nyola oshipalanyolo eshi: "PORT NOLLOTH YA NINGA OSHIHAKANWA SHOVALANGE."

Onda hala nee okupopya ko sha ngaashi tashi landula: Ovalange vahapu owe va teyela po omaumbo avo osho; ile u ke a teyife po komesho. MOlange ohamu longo ovanhu 3,450 modula keshe, ovo omuvalu wavo muhapu ve na omaumbo koWambo, nomuvalu umwe owovamati (ovanyasha).

Kwinya nee koPort Nolloth oku to ti okoshihakanwa shovanhu ava (Ovalange), kandi shii nande ngeenge omuvalu aushe oo nda tumbula metetekelo, ove (tate Nakwaanda) ou na mo tuu oshili lela kutya ohau i shili koPort Nolloth. Owa lundila hano nowa nyateka omaumbo neehombo dovanhu vahapu, ovo ihava ende ko koshilongo osho. Nongeenge oshi li ngaha; oshipango osho sha popya sha kombinga yeehombu, patse ove oto talika "Omuteyi" weehombu dovanhu tava longo ku CDM. Shaashi oshinima sha tya ngaha otwe shi loloka nee, osha popilwe ngoo vali pokati opo kuvamwe.

Ashike didilika: Inandi tya koshilongo osho tuu osho Port Nolloth ihaku iwa, ndele vahapu ava hava i ko, ohava ka landa oinima yavo, tashi ti olo elalakano. Ngeenge nee owa mona ko ovo wa mona tava ningi

## Edhimbulukitho lyowina

**Kaainyolithi amuhe naambesteli yoshifo shOmukwetu aasimanekwa, otatu mu tyeyithile mpaka, kutya nani omumvo gwa yi, tamekeni nomalongekidho gomumvo tagu ya, mboka inaamu tameka natango.**

**1. Ondando yoshifo shetu oyi li natango ngaashi shito omumvo tagu ya, R6-00 na R17-00 mondhila, kombanda yomafuta. Otwa pumbwa ano nomomumvo tagu ya eyambidhidho lyoye okukaleka po oshifo shetu momimvo tadhi landula.**

**Eyambidhidho ndika oto li gandja sho to inyolitha ngoye mwene nokutsa wo yalwe omukumo, nayo wo yi inyolithe. Ngele owe tu tumine R6-00, tse otatu ku tumine iifo 24 omumvo aguhe. Iifo iyali omwedhi kehe. Shoka osho eyambidhidho twa dhiladhila.**

**2. Itsa omukumo u gongele omadhina gayalwe momukunda gweni, molukanda lweni nenge momudhingoloko moka wa tseya, kutya kamu na omuyakuli a tya ngaaka. Iifo yawo otayi kala hayi ya medhina lyoye, ngeleshoka osho ya hala.**

**ELONDODHO: Ino tuma nando edhina lyomuntu kutse, manga inee ku pa oshimaliwa she. Oto ka gwila mbala moongunga. Aagongeli yomadhina ya tya ngeyi ohatu ya pandula noopelesenda 10% kukehe edhina ye li tuma. Tu yelithila ano tu ku tumine oofooloma dhomadhina.**

**Omukalo gwomuntu gumwe awike megongalo, oye i inekelelwa egongelo lyomadhina megongalo alihe, omukalo ngaa omwaanawa, sho gwi igililwa, ihe ogwa kulupa. Omukunda kehe nolukanda kehe, otalu vulu okugongela omadhina galwo e taga tumwa koOmukwetu. Mboka mwa hala okukwatha ngeyi, puleni omayeke kumboka haa mbesitele shito, ye mu kwathe.**

**3. Opu na wo ompito yakehe gumwe a hala okutaandelitha oshifo shOmukwetu, mokati kaamboka ya hala okulanda ooshimwe nashimwe esiku kehe tashi holoka. Ondando yoshifo shimwe 40c nohatu gandja oopelesenda 20% kukehe oshifo wa landitha po, epandulo.**

**Onawa u tameke manga nomwaalu omushona, opo u tale nkene tashi ende. Iilonga ayihe twa fatulula pombanda, otayi vulu okulungwa kukehe omuntu. Ano omumvo tagu ya inaku kala nando okakololo moshilongo shetu; kutya osikola, okomboni, omukunda nenge olukanda, Omukwetu ihaa thiki mo, sho kaape na ngoka aniwa ta vulu okumbesitela.**

**Pula ano uyeyelele kutse nenge kungoka wa tseya he shi ningi pooha nangoye, opo eyakulo ndika u li hedhithe popepi nomudhingoloko gwoye. Nguka ogwo omukalo twa hala, tu koleke nagwo olunza lwoshifo shetu, shi tsikile nokomeho. Nogwo wo omukalo gwokutaneka ontseyo yoshindji moshigwana shetu.**

**Amushanga gwOmukwetu**

omalihafifo, osho oshinima ngaa shimwe, ngaashi kwa tiwa komukulu wonale: "Ihadi imi di he na oipele." ashike inashi kwatelela mo ovanhu aveshe.

Onatu popyeni vakwetu nokushanga oinima twe i konakona nawa, okudja etameko fiyo ehulilo laasho to shange, ndele hakushundula ovanhu aveshe.

Umwe womovanailonga,  
Oranjemund

**OKUTULA ESHIIVIFO LOYE  
MOMUKWETU, OSHO OKULO-  
MBWELA OMUNHU KESHE  
MOSHIWANA. LANDELA HANO  
ESHIIVIFO LOYE ONHELE  
MOMUKWETU.**

Meme Wilhelmina Iindongo (64) gwegongalo Tshandi, Ukwaluudhi, omukunda Omaumba, okwa hulitha 28.2.1987 muwehame wethimbo ele Ps.27:1.12.

Suoma N. Shoombe

Kuku Amalia Shipanga Ndjago, okwa li e na oomvula 100. Aatekulu 99, aatekulululwa 43. Okwa mana oondjenda 6.8.1987. Efeso 6:14-20.

Jossy P. Iiyambo  
Windhoek

Kuku Frederika Niinane Amapindi, momukunda Olungalunga, egongalo Olulongo. Okwa mana oondjenda 18.9.1987, muukokele womimvo 110, muwehame wethimbo ele. Okwa thigi ko oyana yane aatekulu 33 naatekulululwa 75. Eimbilo 410, Fil. 1:21

Nailoke Ntinda  
Olulongo

**Ehekeleko**

Onda hala ndi hekeleke Benjamin Kathindi Uushona, ngoka a thigwa po kuyina Ester Martin 29.10.1987. Kalunga na thete po omahodhi goye, ne mu hekeleke omuhe.

Adreas N. Ushona

Onda hala ndi hekele tate Jonas Uushona ngoka a thigwa po komuholike gwe. Eimbilo 410

Uushona Sakky Natangwe Matias  
Mweshipandeka

**Olupandu**

Fye ohatu yandje olupandu linene kovamwatate ovaholike muKristus eshi mwa li mwe tu yakula shili pefimbo loluhodi leefya datate nopefimbo a li moshihakulilo meembete, otwe mu pandula unene. Inamu tu dimbwa natango momalikaneno.

Julia Kapier Nghihalwa  
Ohalushu

Kuku Filemon Uushona waMbinda (80) momukunda Ethindi mOndonga, okwa mana oondjenda 28.9.1987 muwehame wethimbo ele. Okwa

**IIKOLITHA**


Iikolitha otayi adhika miilongo niilongo. Noshilongo kehe otashi longitha pamukalo gwasho. Iikolitha iidhigu oya nwinwa momagumbo gaawiliki yoshigwana aakwaniilwa, omalenga nooyene yomikunda, opo pwaa holoke epiyagano ewinayi maantu. Omalovu nande ogo ge na alkoholi ya siluka, onkee tuu nago inaga kala ga patulukila omuntu



**Oshiponga shomulilo**

Ondunda ya tseyika nawa nedhina (Jambolongo-ndjo Garage) Auas Motors Spares No 2, oya pi po 11.10.1987 pOmafo, pombali (2 00H) yomutenya. Ositola, Bottle Store noSpares oya lunguna po sheke, inaamu hupa nando osha. Etengeneko lyomwaalu gwekanitho moshiponga shika oli thike R68 000. Kalunga na hambeleke oshoka inamu pila omuntu. Kaayakukwa yetu otu na natango etegameno tu tsikile mbala neyakulo lyetu ngaashi shito.

Moses Auala  
P.O.Box 256, Tel 168  
Ondangwa 9000



thigi ko omukulukadhi gwe noyana 11 naatekulu 40.

Anna Nangombe Uushona  
Amakali Comb. School

Martha V. Haindongo (95) weongalo Ohaukelo, Onangwe, okwa fya ko ovana vavali, ovatekulu 8 novatekulululwa 7.

Joel W. Shitaleni  
Rosh Pinah

Hilma Auguste Nampala, momukunda Ontananga mOndonga, okwa mana oondjenda dhe muwehame wokathimbo okafupi 2.2.87. Okwa thigi ko he nayina Eimbilo 533.

Anna T. Amadhila

Kuku Simon Ntanga yaSheya 25.4.1987 ombaadhillila megumbo lye, Okwa thigi ko omuselekadhi noyana yane naatekulu.

Momasiku 12.9.1987 Omuwa okwa zimbula mumwayina Sessilia Uushona Kadhimo Shimuni, muwehame wethimbo efupi mOndandjokwe. Okwa thigi ko oyana yatano naatekulu. Eimbilo 48.

Rachel Nangula Mbango  
Omuntele

Sakarla Edward Mutlifa, 18.8.1987 moshipangelo shepangelo mOshakati muwehame wethimbo ele. Okwa thigi ko aakuluntu ye naamwayina 6 naatekulu 6. Eimbilo 400

Amunyela Esther Nanyanga  
Olukonda

**Omahaleloyambeko**

Aaholike muKristus Jesus, ethimbo nethimbo ohandi mu dhimbulukwa, naohandi mu yuulukwa wo. Momutima gwandje omu na enyanyu enene molweyakulo lyeni ndyoka mwe tu yakula nalyo, noshu wo sho twa kaleni pamwe ongashi naanaa santu naamwayinathana 'igo twa hulitha oshigongi shetu.

Otandi mu halele omayambeko taga zi kuTate Kalunga mokwiilonga kweni. Lesheeni negalikano, Tate ote mu kwatha.

Ehangano lyeni nali kale nelago. Tu dhimbulukweni wo momagalikano, natse itatu mu dhimbwa. Iitya yoku mu pandula kandi yi na. Ohole yaKalunga Tate nayi mu indjipalele ne Aangandjera Sec. School.

Ekundo lyeni: 1Joh 1:1-10

Peha Iyaanasikola yetu  
Iipinge Sarti  
Mwaala Sec. School

**Ebandulo**

Omasiku 24.6.1987 onda li nda kwatwa komukithi gwombaadhilila koshigongi shaagundjuka megongalo Olukonda. Kanda li tandi popi. Momasiku 16.7.1987 onda tameke okupopya ewi nolye ya.

Otandi pandula oondohotola naapangi ayehe yomoshipangelo shaNandjokwe, ookuume amuhe mboka mwa li mwa talele ndje po nomwa kala nokugalikanena ndje. Tate Kalunga oku uvu omagalikaneno geni agehe.

Otandi pandula wo aagundjuka ooyakwetu mboka ya kambadhala okufala ndje koshipangelo. Otandi ti owala Kalunga ne mu gwedheleko kohenda yeni ndjoka mwe yi gwanithile ndje.

Omwa gwanitha chalo nompango ya-Jesus ngaashi ta ti mu Joh.3:15 Otandi pandula Kalunga kandje Ps. 103:2-5, Ps 116:1-12.

Anna Lukas  
Ambili S. P. School

kehe. Ngashingeyi otaga nuwa nokuunona uushonashona.

Oohapu dhaKalunga odhi na wo omalondodho ogendji kombinga yiikolitha. Etumbulo inamu kolwa, otali adhika opendji mOmbimbeli. Ongeleki ohayi kambadhala mpoka tayi vulu okupopila aantu yaaha vundakane niikolitha.

Epulo ohali thikamene omuntu oyo ndika; iikolitha nayi nuwe nenge inayi nuwa? Epulo ndika kali shi kuyamukulilwa peha Iyamukweni. Ngele omuntu ta nu, osha yela, kutya ota dhana nomulilo.

Shaa tuu omuntu ta pataneke ndokotola a lombwelwa, kutya ina nwa, ihe ota nu owala, osha yela kutya omuntu ngoka a ningi onkolwemvu. Otu na aantu oyendji ye li monkatu ndjika, nongundu yawo otayi gwedhelwa esiku nesiku. Ngiika omuntu a tyu ngaaka otashi vuluka u tye ina kala nekoto. Oyendji oya nu nekoto, ohaluka ya pwile mo. Epulo oli li owala mpaka, kutya omuntu na dhane nuuzigo mbuka nenge na ninge ngiini?

Uudhigu wokomwenyo itau vulu okufadhukiwapo niikolitha. Okuninga ngawo, okugwedhela ashike uudhigu kuukwawo.

Kotoka ano uuyecele mboka u li mungoye waa shituke omilema.

Emma Nd. Kandjala  
Omuntele

**OMUKWETU**

Oye oshifo shOngeleki Onkwaevangeli paLuther yomuSWA/NAMIBIA.

Ohashi nyanyangidhwa mOshinyanyangidho shOngeleki mOniipa.

Omukuluntu gwoshifo omumbisofi Kleopas Dumeni.

Amushanga gwoshifo omusita Sebulon Ekandjo.

Ondando yOmukwetu muNamibia naSouth Africa R6,00 komumvo.

Palwe muAfrica R10,00 nokombanda yomafuta R14,00 komumvo. Mondhila R17,00.

Ondando nomambesitelo agehe naga tumwe kOmukwetu, Oniipa, P/Bag 2013, Ondangwa, 9000.

ELOC PRINTING PRESS  
PRIVATE BAG 2013, TEL. 11, ONDANGWA 9000  
SWA/NAMIBIA